

**UCAPAN PERDANA MENTERI DI UPACARA
PEMBUKAAN RASMI PUSAT PEMBANGUNAN
MASYARAKAT SABAH. DI KOTA KINABALU,
SABAH PADA 31HB JULAI, 1972**

Y.A.B. Tun Datu Haji Mustapha¹ dan Toh Puan, Y.B. Menteri-
menteri dan Pembantu-pembantu Menteri-menteri, Saudara-saudara
sekalian.

Terlebih dahulu, sukaiah saya mengucapkan berbanyak-banyak
terimakasih di atas penghormatan dan sambutan meriah yang
telah diberikan oleh Kerajaan dan rakyat Negeri Sabah kepada
saya beserta rombongan saya semenjak tiba di sini pagi tadi.

Setemunya, saya ingin menyatakan penghargaan kepada Y.A.B.
Tun Mustapha atas penghormatan bagi saya merasmikan pem-
bukaan bangunan Pusat Pembangunan Masyarakat yang indah ini.

Semenjak lawatan saya yang terakhir tahun sudah, saya per-
hatikan banyak perubahan yang telah berlaku di sekitar Kota
Kinabalu ini iaitu kemajuan-kemajuan di bidang pembangunan.
Ini jelas sekali membuktikan kejayaan-kejayaan besar yang dicapai
oleh Kerajaan Negeri Sabah di bawah pimpinan Ketua Menterinya
yang dinamis, Y.A.B. Tun Datu Haji Mustapha.

Saudara-saudara sekalian,

Saya sangat tertarik hati dengan langkah tegas Kerajaan Negeri
Sabah mengadakan sebuah Jabatan khas bagi mengendalikan dan
melaksanakan rancangan-rancangan Pembangunan Masyarakat-
nya. Bahkan setahu saya, Sabah merupakan Negeri yang pertama
yang telah menubuhkan sebuah Jabatan seperti Pusat Pemba-
ngunan Masyarakat ini khusus bagi maksud Pembangunan
Masyarakat.

Pandangan yang jauh dan positif ini patutlah menjadi contoh
tauladan kerana Pembangunan Masyarakat adalah satu konsep
dan strateji yang sangat penting di dalam sebuah Negara yang
sedang membangun. Ini seperti kata Y.A.B. Tun Datu Mustapha
sebentar tadi, segala rancangan Pembangunan Negara tidak akan

¹ Y.A.B. Ketua Menteri Sabah.

memberi erti yang sepenuhnya dan mendatangkan seberapa besar munafaat sekiranya tidak ada penyertaan rakyat sendiri dalam seraua bidang pelaksanaan rancangan-rancangan pembangunan itu.

Kita telah melancarkan rancangan-rancangan Pembangunan Masyarakat dengan teratur semenjak tahun 1962 mengikut strategi dan konsep yang sesuai dengan kehendak-kehendak Negara. Sebenarnya rancangan Pembangunan Masyarakat menjadi sebahagian daripada Rancangan Pembangunan Negara dan Luar Bandar kita dan ini adalah disebabkan oleh kejayaan sistem Buku Merah yang menyatukan tindakan semua pihak yang menjalankan tugas-tugas Pembangunan sama ada jentera-jentera Kerajaan atau pun swasta.

Rancangan Pembangunan Negara kita dilaksanakan dengan berperingkat-peringkat sebanyak empat peringkat; pertamanya, mengadakan sebanyak-banyak infra-structure bagi kepentingan rakyat, manakala peringkat keduanya menitikberatkan peranan rakyat sendiri supaya menghasilkan setinggi-tinggi munafaat daripada usaha-usaha itu.

Walau bagaimanapun, Pembangunan Masyarakat adalah satu proses yang berubah mengikut keadaan daripada satu masa ke satu masa. Bagi Negara kita Peristiwa Mei 13 yang masih tidak luput dari ingatan telah memberikan kita kesempatan untuk memandang kebelakang kepada corak masyarakat yang hams kita cipta. Sebagai sebuah Negara yang rakyatnya terdiri dari berbagai suku bangsa; berbagai ikatan ugama dan kebudayaan, segala usaha dalam semua bidang Pembangunan Ekonomi, Sosial dan Kebudayaan haruslah ditumpukan kepada kehendak-kehendak Perpaduan Negara kerana dengan adanya perpaduan inilah maka kita dapat mewujudkan masyarakat yang benar-benar kukuh dan progresif.

Saudara-saudara sekalian,

Saya rasa peranan Pembangunan Masyarakat dalam rangka mewujudkan Perpaduan Negara amatlah penting sekali. Pembangunan Masyarakat hendaklah diarahkan kepada matlamat ini menerusi kegiatan-kegiatan yang dapat memberikan kesan kearah memperbaiki serta menyeimbangkan perbezaan ekonomi dan sosial rakyat kita yang berbilang bangsa.

Saya ingin mengambil kesempatan pada hari ini untuk mengingatkan kepada mereka yang terlibat dalam pelaksanaan Rancangan Pembangunan Masyarakat di Negeri ini dan terutamanya kepada Ketua-ketua Jabatan Kerajaan bahawa segala Rancangan cuma akan berjaya sekiranya dan penyelarasan yang kemas di dalam segala usaha-usaha yang dilaksanakan itu.

Kita faham ada jabatan-jabatan Kerajaan yang menjalankan usaha-usaha dan rancangan-rancangannya melalui perkhidmatan-perkhidmatan lanjutan. Usaha-usaha yang dijalankan secara berseendirian sudah barang tentu tidak akan membawa kepada kesan-kesan yang memuaskan. Apa yang dikehendaki ialah supaya usaha-usaha tersebut diselaraskan secara "co-ordinated approach" oleh semua pihak yang bersangkutan. Malahan segala Rancangan Pembangunan Negara kita akan gagal sekiranya usaha-usaha tersebut tidak disusun dengan semangat "Team-work" dan bekerjasama ini.

Sebenaraya, perkara ini sudah berulang kali saya sebutkan dan saya mengambil perhatian berat atasnya. Dalam hubungan ini saya ingin mengucapkan tahniah kepada Kerajaan Negeri Sabah yang telah mengambil tindakan membentuk sebuah Jawatankuasa Pembangunan Masyarakat Negeri di dalam rangka Jawatankuasa Tindakan Negerinya bagi maksud menyelaraskan dan menyatukan segala dasar dan pelaksanaan Rancangan-rancangan Pembangunan Masyarakatnya istimewa sekali usaha-usaha Kerajaan.

Saya berharap Pusat Pembangunan Masyarakat ini sendiri akan dapat memainkan peranan yang penting sebagai Jabatan yang boleh menyelaraskan segala kegiatan-kegiatan Pembangunan Masyarakat dikalangan Jabatan-jabatan Kerajaan atau separuh Kerajaan, Badan-badan Belia, Pertubuhan-pertubuhan dan Badan-badan Sukarela bersama-sama dengan rakyat menerusi Jawatan-jawatan Kuasa Kemajuan Kampung.

Selain dari itu, saya ingin juga menegaskan bahawa kejayaan Pembangunan Masyarakat berpunca dari Pimpinan yang dinamis dan progresif istimewa sekali dikalangan Pemimpin-pemimpin Masyarakat diperingkat-peringkat bawah dan di kawasan-kawasan luar bandar. Tindakan Kerajaan Negeri Sabah untuk mengadakan berbagai latihan bagi meninggikan mutu Pimpinan dikalangan Pemimpin-pemimpin Masyarakatnya di Kampung-kampung dan dikalangan Belia-belia serta Ahli-ahli Jawatankuasa Kemajuan

Kampung adalah satu langkah yang positif. Saya juga tertarik hati dengan usaha-usaha Kerajaan Negeri Sabah memperbanyakkan kursus-kursus Tata Rakyat dan Latihan-latihan dalam bidang Pembangunan Masyarakat kepada Pemimpin-pemimpin Masyarakat dan pegawai-pegawai Kerajaan.

Begitu juga pembentukan barisan PELUPOR PEMBANGUNAN MASYARAKAT di Negeri Sabah ini adalah satu strateji yang baru dalam bidang Pembangunan Masyarakat bagi mendatangkan rasa tanggungjawab dan kesedaran dikalangan Pemimpin-pemimpin Masyarakat dan Pemimpin-pemimpin Belia terhadap masyarakatnya sendiri tanpa memikirkan faedah untuk dirinya sendiri.

Saudara-saudara sekalian,

Sebagaimana yang saya sebutkan tadi, proses Pembangunan Masyarakat berubah mengikut keadaan dan kehendak Negara dari satu masa ke satu masa. Memandang kepada kehendak inilah maka beberapa hari yang lalu satu Seminar berkenaan dengan Pembangunan Masyarakat telah diadakan di Kuala Lumpur yang dihadiri oleh pegawai-pegawai tinggi Kerajaan daripada berbagai Kementerian, Badan-badan Berkanun, Badan-badan Belia untuk bersama-sama membincangkan masalah-masalah dan kehendak-kehendak Pembangunan Masyarakat.

Saya difahamkan bahawa Pusat Pembangunan Masyarakat ini sendiri telah diminta menyediakan kertaskerja mengenai pelaksanaan rancangan-rancangan Pembangunan Masyarakat di Sabah bagi Seminar tersebut. Saya sendiri memandang berat kepada perkara ini dan sedang menunggu akan rumusan-rumusan yang dicapai pada Seminar tersebut untuk dikaji supaya segala Rancangan Pembangunan Masyarakat di Negara kita dapat diperkemaskan lagi seimbang dengan kehendak-kehendak Negara kita pada hari ini.

Mungkin pada satu masa kelak, pihak Kerajaan Negeri Sabah akan dapat menyelenggarakan Seminar Pembangunan Masyarakat dengan adanya sebuah pusat yang sebegini indah dan lengkap. Saya percaya ramai pegawai-pegawai yang terlibat dalam rancangan-rancangan Pembangunan Masyarakat dari Negeri-negeri lain di Malaysia yang ingin memerhatikan usaha-usaha Pembangunan yang telah dilaksanakan oleh Kerajaan Negeri Sabah ini untuk dijadikan contoh tauladan negeri mereka sendiri.

Saudara-saudara sekalian,

Sekadar inilah sahaja ucapan saya dan saya sekali lagi mengucapkan terimakasih kepada Kerajaan dan rakyat Negeri Sabah ini atas penghormatan yang telah mereka tunjukkan. Saya berdoa semoga segala cita-cita Kerajaan Negeri Sabah melaksanakan Rancangan-rancangan Pembangunan Negerinya akan berjaya demi kepentingan kita bersama.

Saya dengan rasa penuh syukur dan sukacitanya merasmikan Pembukaan Pusat Pembangunan Masyarakat Negeri Sabah ini.